

Асқар таудың сәні жоқ, төрт түліктің қонысы,

Басылмайтын сонысы, көк майса белі болмаса.

Өзен-судың сәні жоқ, өрлеп құлай қанатын

Жағасы малға толатын, аймақты елі болмаса.

Би мен бектің сәні жоқ, елін қорғай алмаса

Ыстығына күймесе, суығына тоңбаса.

Дулат Бабатайұлы

Дулат Бабатайұлы 1802 жылы Шығыс Қазақстандағы Аягөз өңірінде дүниеге келген. Ауыл молдасынан сауат ашып, мұсылманша білім алған. Ол білімін сөз өнерін қастер тұтқан өлкеде өмір сүрген ертедегі ақын-жыраулардың мұрасымен, ежелгі қисса-аңыздармен байытып, елдің арғы-бергі тарихын да жақсы білген. Өз дәуірінің ең білімді адамдарының бірі ретінде сол кездегі саясатты да саралай біліп, ағын ақ, қарасын қара деп ажыратып беріп отырған. Өлеңді суырып салып та, жазып шығаратын оның жырларының сыншыл да, сыршыл ғана емес, айбынды да, айдынды келетіні де сондықтан. Зарарлы қоғамның ел басына түсірген қайғы-қасіреті кеудесіне сыймай, «өзі елді қорқытып, өзі елден қорқатын» жемтік көрген күшігендей тойғанына мәз болатын атқа мінер пысықайларға ыза болғанда ол мұңын жырға шағып, тілін өткір қару еткен. «Жырымды менің сұрасаң, сары алтынның буынан, сырымды менің сұрасаң, тұманың тұнық суынан, кеудеме қайғы толған соң, тұнық жырман жуынам» дейтіні әсте тегін емес.

Ақтамберді мен Бұқар жыраудың жыр үлгілерін одан әрі дамытып, оны ол жазба ақындарға тән көркемдік мәнермен, тың теңеумен, соны бейнелермен байыт-



Дулат Бабатайұлы

ты. «Саудагер сарттай қайтты өмір құмар ойнап ұтылған», «Бұзауы өлген сиырдай, мәңіреп жұртқа ой қайтты» тәрізді тапқыр теңеулер мен алты-жеті жолдан қайырылып, бір ұйқаспен өріліп отыратын жыр үлгісі де осы Дулат ақынның жаңалығы екені даусыз. Жалпы ол қазақ жырын көркемдік тәсіл мен түр жағын жаңа сатыға көтерген ақын.

Райхан БАБАЕВА,

№4 орта мектептің қазақ тілі мен әдебиеті пәнінің мұғалімі.

Алматы облысы.